

Mama di Natalee ta kere cu e tres hobennan sa mas di su yiu muher

ORANJESTAD (AAN): Famianan di Natalee Holloway ta cuminza sospecha cu e 3 hobennan deteni mester sa algo mas di loke a socede cu nan yiu.

Esey a sali publica despues di un entrevista cu un periodista Mericano.

Beth Holloway Twitty a bisa cu e tin e presentimento, cu e tres hobennan, esta e Hulandes y dos Surinameño, mester sa kico a socede cu su yiu muher. E mama a hasta agrega, cu si acaso e no cuminza mira resultado pronto, e por cuminza pensa cu autoridad Arubano ta tratando di proteha e tres hobennan aki.

"Tur tres di e mucha hombernan ey sa kico a pasa cune," e mama a declara den un entrevista cu e periodista kende a bishita su camber na Holiday Inn.

Pero e mama no kier a bisa loke e ta "pensa" kico e hobennan aki a haci, of si acaso e ta kere cu su yiu muher ainda ta bibo.

Ademas di esey, e mama di Natalee a indica cu e no ta



satisfecho cu e trabao aki. "Mi no ta hayando ningun contesta," el a bisa. "Mi no ta sinti cu nos a bay dilanti desde e dia cu mi a yega aki."

Dialuna den entrevista cu e show "Today" di NBC, e mama a indica sinembargo cu su kehonan no ta dirigi specificamente riba Gobierno di Aruba, pero mas bien a bin dilanti debi cu e ta frustra di no sa kico a pasa cu su yiu muher. "Mi ta sinti cu nan ta dunando mi tur informacion cu nan por. Aunke mi ta frustra keto bay pasobra mi mester di contesta."

E mama a agrega, cu el a

perde 10 liber di peso desde cu e buskeda a cuminza, y e tin problema pa drumi. El a bisa cu e ta haya tog forza danki na su fe grandi den Dios, y e sosten di famia y Arubianonan preocupa.

El a bisa cu el a mira e dos

Security Guardnan tambe, esta Micky John y Abraham Jonez, y el a nota cu e dos hombernan tabata mes sorprendi cu e ta cu tur cos. "Mi ta kere cu nan ta erroneamente deteni," e mama a declara.

Beth Holloway Twitty a bisa caba den pasado, cu e lo no bandona Aruba tanten cu su yiu muher no worde haya.

"Mi lo no keda satisfecho te ora cu nan dunami mi yiu back. Mi kier e y mi kier e awor".